

RIME PIEMONTESE

di "alex",

DESSE MAN

DESSE MAN... L'è na cita cadè-a
tra doe vite; e l calor dl'un-a a passa
pòch a pòch drinta a l'otra che pen-a
as n'ancòrz e sta còtia ant la fassa...

Desse man... Una mare a sò cit
mostra coma ch'as marcia ant la vita:
su, parèj! a va bin, marcia drit!
(... guai però se l'agiut a lo chità!)

Desse man... Quindes ani a l'avran
se doe fiètte ch'a ciancio sot vos
Van adasi, spassèggio dosman:
tra le fior van sugnand un ë-spos.

Desse man... Ij pericòl 'd na stra
una cobia a traversa e a dësfiga...
Un vejòto a l'ha ansem na masnà:
tra coi doi chi sarà-lo la guida?

LA SEVERITÀ

Ij GIOVO a son sever... Sola, la fòrsa
a l'ha 'l difet sovens dël sò vantagi
e doa bastria toché, strenz com na mòrsa.
Chi mach da jer a l'è butasse an viaggi

as fërma pa a guardé sota la scòrsa
e marcé drit e dur l'è 'l sò coragi.
Ma chi già as sent la vita ch'a sè smòrsa
e a ved già pa distant ël grand passagi

marcia pi adasi e a sà guardé pi andrenta.
E se a dev di: « ti 't l'has sbalià! » — n'ufissi
bin grev për n'òm, na còsa ch'a spaventa —

a la moderassion temprà 'l giudissi.
... La man ëd chi l'ha vist tante tristesse
'd cò quand castiga vorria fé 'd carezze.

ÈL GIEUGH DLE BÒCIE

SÈL TEREN dla larga piassa
cor mia bòcia: ant sël pi bel,
j'è na gaira ch'am la massa
e 'l mè tir s' n'è va a rabel...

Parèj 'd cò la nòsta vita
l'è na bòcia ant sël teren:
a smiava seulia e drita,
ma peui ecco a va pi nen.

A comensa na gairètta
ch'an fa fé dij bei sautin:
as ved nen, an fa trapètta,
l'è la gaira dël sagrin.

Fin ch'un di na gaira gròssa
i trovoma an mes dla stra,
e a n'aresta la caròssa
e 'nt un nen an campa là.

NA STRA

A J'E' na stra a Turin tra piasse e leje
che mi fas sempre un gir për nen passeje.

E quand che pròpe am toca i passo an pressa
co' 'l cheur d'antlora e con la pen-a istessa:

na stra doa j'è na cà che un di lontan
a j'è mòrtje mia mare, a l'ùltim pian...

DÒP CARLEVÈ

LA PI BRUTA ardità dël carlevé
l'è vèdde për la stra sta gran sporcissia,
d'ògai forma e color tut ës papé
che peui ël vent spatara con malissia.

A s'amuso j'osle!, e ij can 'd cò lor,
ma as lasso pa daré tanti pastiss...
Inutil, l'òm l'è un gran dominator,
l'è pròpe prim an tut. Anche 'nt l'è mnia.